

## Hunermendê şêwekar Dara Mihemedelî: Firçe û rengên xwe, dike gule û bi dijminî ve diteqîne

Xelîl Duhokî



**H**unermendekî navdarê kurd e. Eve ji sîh salan pêtire ku bi germî dixebite û cihek taybet di nav qada hunerê kurdî û cîhanî de heye. Ew di sala 1950-ê de, li bajarê Hewlêrê ji dayîk bûye. Di sala 1974-ê de, diplom bi hunerê şewekariyê, li Bexdayê wergirtiye. Ew endamê Sendîka Hunermendan, Rojnamevanan û Komeleya Şewekarên Iraqê ye. Yek ji damezrînerên çend bingeh û geleriyan kurdî ye, mîna geleriya Erbîlla, , geleriya Zamo û bingehê Karê Destî li Hewlêr û Silêmanyê... Di gelek govarên kurdî de, wek nîgarkêş kar kiriye û wênên çendîn pirtûkên perwerdê jî efirandine... Çend pirtûk berhev û çap kirine.

Wî hin dîtinên huneriyên taybet hene. Me viya hizra wî li ser hin peyvan bizanin û wî jî, bi vî rengî bersiv da û got: “ *Xodîk, hesp, pît, çav û kelepore*” bi şeweyekê giştî, di nav karên min yên hunerî de, sîmbol û hîmayên derbirîneka taybet in, ji bo (Haleteka taybet), mîna aliyên saykolojî, rehendên estetîk û ciwanîyê, ciwakî, bihayên kultur û kelepore kurdî ...

*Di pênavaya bi destxistina kar, berhem û hunerekê kurdî yê hevoçerx û modêrn.*

*Peyva "Xodîk" di navbera ronahî û tariyê, başî û xirabiyê, xweşî û nexweşiyê, geşbînî û reşbîniyê de, kêşa jiyaneke bêdawî ye.*

*Her wesa "Hesp", ji bilî ciwaniya wî, candarekê pir sûdbexş e jî, lê li cem min, helçûn, berxwedan, berdewam bûn û heval e..."*

Tabloyên wî, ji rengên ciwan, hestên nazik û dilveker pêk dihên. Ew pir girêdayî dîroka gelê xwe ye û dixawaze di rêya tabloyên xwe de, dastan û çîrokên kurdî, zîndî bike ve û tabloya dastana Şor Mihmûd û Merzin giyan, ya Mem û Zînê, baştirîn nimûnên efirandinên wî yên serketî ne...



Ew hunermendek welatparêz e û doza gelê kurd, di nav xwîna wî de ye. Ji lewre jî, hemû jiyana xwe, ji bo pêşxistina wê meselê terxan kiriye û firçe û rengên xwe, dike gule û bi dijminî ve diteqîne. Li ser hebûna gelê kurd, ziman û olên kurdî dipeyive û dibêje: "Yek ji binemayên serekiyên netewa kurd, bi rex erd û dîrokê ve" ziman e". Evca bi karanîna pîtên "zimanê kurdî, elfabeya latînî, zerdeştî û kurdiya berî musilmantiyê" bi şêwe û formeke modern, di nav karekî hunerîyê şêwekarî de, ji bilî aliyê rewşenbîrî û keleşporî, aliyê ciwanî û estetîka, dide ber çav û bêdera hunerê şêwekariyê, dewlemendtir dike."



Belê; ew berî her tiştî mirov e û xemên mirovî wî dorpêç dikin. Lê azar û xemên jinê, wî dagîr dikin û bi hêza tabloyên xwe, berevaniyê ji doza wê dike û dixwaze barê wê sivik bike û bigehîne pileyên bilindtir, di şaristaniyetê de... Hemû rûdan û karesatên cîhanê, di nav çavan de dibîne û hemû çavan jî, di yê xwe de, himbêz dike... Ew diyardeya "çavî" bi vî rengî şirove dike û dibêje: "Diyarde û hêma "çavî", çavek, du, yan jî zêdetir, çi ji meselê naguhire û di hindêk haletên taybetiyên min de, hemû jiyane, di nav çavê de, di nav çavê xwe de, dibînim."



Jin, tawis û xodîk

Ew hunermendek bi nav û deng e û beşdarî di dehan pêşangeh û festîvalên kurdî û cîhanî de, li Hewlêr, Silêmanî, Duhok, Kerkûk, Riwandiz, Koyê, Bexda, Urdin, Polonya, Elmanya, Japon û Korya Başûr, kiriye. Di wan pêşangehan de, bûye sefirê welatê xwe. Xem û derdên gelê xwe yê bindest, gehandîne gelek aliyên cihanê û bi wê çendê, şiyaye rola xwe bilîze û azarên welatê xwe yê wêrankirî, dante ber çavên xelkê wan welatan û piştevanîyê ji bo doza gelê kurd peyda bike...

